

倡義錄

虎溪集卷之二

앞표지 뒷면

虎溪先生遺集目錄

卷之三

倡義錄

序

誌略

通諭一鄉士友文 丁卯

再諭文

三諭文

諭各回募粟有司文

後錄

呈左道號召使文

呈右道號召使文

義所傳令

義所榜諭

教書

附

諭中外大小臣僚耆老軍民閭民

宣諭三道士民

義所招諭文

號召使關

附

管餉使關

卷之四

倡義錄

諭一鄉大小人員文 丙子

後錄

通諭道內文

節目

倡義日錄

後識

後敘

跋

虎溪先生遺集目錄

虎溪先生遺集卷之三

倡義錄

序

俎豆之事則嘗聞之矣軍旅之事未之學也
此吾夫子訓也然則軍旅非儒者務也而又
有曰戰陳無勇非孝也何哉君子學以求道
所程者詩書誦讀所肄者禮樂和序至於操
弓鳴劍之技鋪陳設伍之法有所不屑而不
暇也然而君子之所謂道者本乎君臣父子
之倫盡夫孝悌忠信之行故常則有安親尊

主之事變則有殉國死長之節是以當君親
之難則發乎秉彝之衷奮乎義理之勇砥礪
以爲刃韜蘊以爲甲手足爲之捍衛樽俎與
之折衝其濟則列於勲庸不濟亦有以扶樹
綱常是則軍旅之義已具於俎豆之中而戰
陳之勇宜其爲忠孝之事也以余觀之若故
贈吏議虎溪先生申公卽其人乎公幼而
性孝奉親以誠纚冠經龍蛇之亂人有勸業
弓馬者公不屑也從寒旅兩先生之門以私
淑退陶與弟晚悟懶齋二公博約征邁蔚然

有斯文之望丁卯金人入境而大駕幸江
都公以一庠生爲召募使旅軒先生旣差定
爲義兵將慨然起膺布韋而從金革之事於
紳而爲介冑之服激厲同志糾合徒衆觀其
節制之密約束之嚴蓋將自當一隊以遂敵
愾之意而會有講和罷兵之命遂停其師上
陳一疏極論興衰撥亂之策於是君上始
知公何狀矣及丙子虜人再搶南城受圍時
則公嘗經郵丞陵署而有朝銜矣卽奮袂首
義登壇誓衆約束節制一如丁卯之爲因頌

衆西赴行到嶺底則國家已定和議矣衆請
罷還而公不聽馳抵廣陵復抗一疏直斥和
議與同志諸公相向痛哭而歸自是卽公遂
與世長辭而終于林野矣於乎公儒者也軍
旅之事非其所聞戰陳之勇非其所試而特
以明於君親之倫列於忠孝之節值國危急
直前不辭有若業之平日而需之當世者然
其義誠偉矣且其兩度義舉雖未能得當以
報而前後陳章有以贊國家經遠之謨揭天
下倫常之義其爲樹立爲如何哉公有手藁

丁丙倡義錄叙列當日文牒節目頗詳而卷首小誌有無功負國等語蓋公之素蘊異於人矣而倡焉而委諸虛擲額焉而歸於空言此所以寓恨於遺錄而又足以讓東韓志士之涕矣 今上丁卯因直指使採聞以道學忠節遂 贈公天官右侍郎後孫等感戴恩榮息所以益闡潛光發巾衍舊藏修繕文集若干卷外別以丁丙錄為一冊將壽其傳俾岱鎮為一言弁于錄竊惟公之為一世師仰未必特藉丁丙之事而顧俎豆軍旅有時

相須之義則不得不論諸後世於是乎書

上之五年

戊辰

良月下澣聞韶金岱鎮謹叙

誌略

余於丁卯之亂被旅愚兩爺所敦迫猥忝本縣
糾義之長軍未到而賊已退去矣及夫丙子再
亂患所以北首爭死而馳赴 行在則國家遽
下城矣與沙西諸公相對痛哭而歸每一念至
憂憤欲死茲庸掇拾前後大小文字爲一通且
以當時日記及團結諸條附于其下俾後孫知
乃祖虛張義聲終始負國之罪如此云

通諭一鄉士友文 丁卯

嗚乎國家之變尚忍言哉 王宮分遷廟社孤
耗二百年禮義之邦一朝爲犬戎之所蹂躪爲
今日臣子者孰無一死之心而况慷慨有志之
士義理讀書之人乎嗚乎不佞素以無似既不
能匡濟於國家昇平之日今乃效忠於患難已
生之後者非不知爲一大羞恥而但秉彝犬馬
之誠得之於天死生熊魚之辨聞之於師早知
臣死於君忠義所當矣今 君父之危艱如是
臣子之職分自在此正奮身直前之日固非操

心退縮之地茲庸揮涕登壇以誓于衆惟我同志之人各自奮勵期有實效幸甚

再諭文

嗚乎我今日國家之變凡有忠憤敵愾之心者孰不欲奮身一死而況平日讀書之人講究義理之學辨沒於死生之分弊屣捐軀徒有向上之誠而已哉不佞素知此義乃欲效忠於國家患生之日以遂其萬一之忱而方今賊勢熾張寡固不可以敵衆則雖若燎原之可撲而正恐杯水之難救豈可以子然特立絕無蚍蜉蟻子

之援并與用力於蒼黃危難之際而尚有國艱
之可圖哉茲於揮涕登壇之日已爲發通告諭
而願與一鄉同志之士極力共濟以保我二百
年宗社之責則宜各爲憤勵倡道之不暇矣
豈敢有逡巡退縮之如是乎幸望念君子夏曉
諭意以爲糾合同聲之應幸甚幸甚

三諭文

嗚乎三千之衆一心猶難故自古誓師之法或
一再而至三至於誓師再三而不用命者則邦
有常刑况今國家罹憂聖上蒙塵凡爲臣子

之分固不可一日心安而神定則至如不佞之
屢屢告諭一出於忠憤義勵之心而不率糾義
之舉者寧可曰其罪容已乎若此書申諭之後
惟我同志之人一向岸視不應則先自馳赴不
避危難而後當啓聞以勘幾分之罪更加十分
調畫以爲量定處事之地幸甚

諭各回募粟有司文

右爲盡心舉行事方今國家不幸西變此劇臣
民之痛曷勝言哉糾義之舉迺臣分不容已
者爲先本縣各回擇定有司以爲倡合董率之

計而至於糧餉一款猝難調劃若或賊勢熾張
軍兵久持則後用軍糧不可不預爲措置茲於
各面抄出募糧都監令飭軍務而又於鄉校書
院鄉所及大小人員許同議開諭隨願隨力各
出斗斛以備資用之萬一而各使盡誠則第當
隨其多寡轉聞處置并以此意著實施行事故
諭

後錄

一各面有司當商量抄定必以勇健有智謀者
其或有疾病難赴者則代以無故人差定領

率卽卽依此知委舉行事

一前衙閒良納粟店匠人及無論公私賤鄉吏
驛吏私砲手摠年少壯健者并無遺領來事
一鄉儒生或老病殘弱而無年少子姪者當以
壯奴代行事

一軍器諸具卒難辦備本邑官軍器當與相通
而若或搪塞則爲先啓聞次急急馳報事

一軍糧調轉之節不可絕乏當與校院任鄉所
及一鄉員相議辦出以爲輸送而如或老病
無奴之人不能領代願出軍糧者諒許事

一措辦軍糧若未及期收捧則當有重罰而為先官穀貸出事

一軍糧軍器并為輸運之時一鄉人無論儒生閒丁公私并有馬之人抄出載來事

一軍器措備萬分時急如有錢財之人為國傾困捐金則當各別馳報轉聞優施褒獎之典右人姓名詳細成冊知委事

一能射能砲者雖或得罪於鄉中渠能回心向義則亦容許應募事

一我國自經壬辰兵燹之後人心未定今且繼

亂凡百條束當十倍加意後乃可對陣以此
各令知委事

一上項諸件各為條約後如或有不遵此令者
當依律馳報事

呈左道號召使

張顯光

文

謹呈為仰告事先生道學之純一忠義之奮激
朝野之所翹望已久不幸夷虜逼境大駕播
遷中外諸臣恟於豕突鄉曲民心急於魚駭方
今國勢危髮廟筭失措朝廷恃我本道者不
帝若手足之捍頭目子弟之衛父兄而所屬

望於今日矣茲於左右號召使卽令糾衆董促
應募而屢屢天書若是懇至凡爲臣子之分
孰敢不效死殫誠於如此危難之日哉仰惟先
生平日以英邁之才德拔出羣僚爲一世之所
推服況今全道之擔任不輕所以有憂勤惕慮
之心而各邑義兵所前後闕旨申嚴準截使之
欣動感激於羣心向上之誠如適道者服龔享
家庭之傳聞見乎師門之訓雖粗知義理之有
君臣父子之分而素以學蔑才劣固不足以臨
大事浚大策措國家於磐石之安然尚有忠憤

義勵之心奮發於今日忠旰以死首爭死報國而已豈敢少有退縮之心乎今方董率義旅指期勇赴而兩道號召使來到關首當依令舉行各令知委後次馳報辭溢情殷無任兢惶之至

呈右道號召使

鄭經世文

謹呈為仰陳痛迫事伏以適道不量驚勞糾率義旅行至中道即見營吏李廷薰文告內二月初五日自江都宣傳官言內和使姜綱入去姜弘立以為若送重臣則和事可成又云兩國和

好則共享太平見此文告讀之未半不覺血淚
被面也夫我國之於天朝不但有服事之勤
而亦不敢有一日忘恩者昔在壬辰之始訂也
肆言假道通使我國我先朝昭敬王斥絕其
使因具奏聞于天朝以爲懲荆之舉遂致外國之
攔入陷我八路覆我三都而末乃夷先君二墓
執國王二子見此罔測之變也昭敬王因
乞師天朝遂發十萬衆十萬斛以救我生靈
陷溺之命而保有我宗社式至于今日休此
莫非天朝之盛恩也顧惟蜂蟻之微亦有天

性則豈敢少忽於向上哉今又我國家不幸酷
被兵燹見此播遷之辱環東一域舉八魚涸之
中嗚乎國勢之際此危險痛哭無地今以本道
號召使之差出已自 朝廷簡擇其賢良才俊
之人而各所義兵同糾合勢一時向赴得遂其
忠君事上之願而平日素講義理只是 君父
一體忠愛二字而已今奈 朝廷和使之論乃
發於罔措之日而使彼犬羊蠢悖之性敢肆蠶
蠹蛇蝎之毒忍心逞意遂欲結和乎況今 絲
綸屢下求望於本道多士者甚切至此所以兩

道號召使闕者及管餉使文告內兵馬糧餉急
急董運指期勿滯各令盡忠於國家遭亂之日
而爲邱恩報毫之計伏惟閣下平日義理明白
才氣英卓不待國家之勤托而己有忠奮敵愾
之勇矣曷不犯冒於艱危之極思所以向前直
赴不避死生哉今此事勢萬分緊急此所以仰
陳情由極力同仇以保我 宗社幸甚

義所傳令

今見號召使闕到辭意懇惻開諭明切有足以
感動人心激勵士氣其在奉行之道寧或後巡

退甕自抵於不忠之科哉惟我韶州卽古文獻
之地平日家庭之所訓誨鄉黨之所勉飭不出
乎忠孝則當君父危急之秋可不激勵奮發
息旣以捍衛之道乎螽蟻之微尚有君臣之分
矧伊人矣苟不能見義思勇同聲効力而坐視
蠶興之播遷廟社之蒙塵但向草間求活則
秉彝同得之天鄒魯素養之風顧安在哉適道
之無似自知儒素之不能效武而上司之敦迫
旣切弮中之忠憤自激義有所不敢辭者茲庸
奮身爲糾旅死長之計幸我同志諸君子各張

義膽以遂敵愾之忱若其成敗利鈍非適道之所逆觀顧當盡吾義而已兵以義名義不以力雖張空拳冒白刃寧有頓挫之慮況今器仗糧餉已令措處兵進有可恃之勢正吾輩效力之秋望諸君各須勉勵故茲知委

義所榜諭

今此募糧之舉實軍國之急務自古軍餉餒而能濟事者未之有也前無可仰之積後無可繼之輸則雖有敢死之勇能戰之心而其如困餒不振何此睢陽烈士之所以城陷身死而竟不

滅羯奴者也方今賊變猝發公儲罄竭國事之
艱危言之痛哭自行朝特思權宜濟事之策
發遣管餉官爲募糧餉補軍需之舉爲今日任
司諸員合宜惕念施行

教書

附

王若曰不弔旻天降禍于我國金虜小醜越茲
蠢動西土人士咸罹兵刃龍灣凌漢清川三
城不能一朝守以至平壤潰黃州散封豕長
蛇之勢有不可遏惟予否德延遭大艱不得
不踵太王之踰梁小避凶鋒茲奉廟社慈殿

出次江都都下士女顛仆道途萬品失序八
路震盪痛心覩貌罪實在予尚何言哉虜賊
自過安州以後屢次致書以要通好犬羊之
言雖不可信在我權宜應變以爲一時緩兵
之計則有不得已而虜心叵測至以拒絕天
朝爲辭此則君臣天地大義截然寧以國斃
不敢從也朝廷方遣晉昌君姜綰回答于虜
中此一款必當嚴辭拒之賊欲捨此一款仍
求和好則雖有下城之恥或紓目前之急第
無厭之欲無已之求一有不從其禍尤酷前

鑑不遠在宋之世危急存亡此維其時乃今日定筭則旬服之卒屯據南漢三南之兵遮絕漢江西北之軍議賊之後廢齊鋒淬刃相機剽滅但江都根本形勢孤危三軍暴露百官倚壁糧餉方匱舟師未集沿江諸屯兵食俱缺西師新敗北軍未到而隳突之患政在朝夕此乃忠臣烈士流涕讀詔血誠起義之秋也咨爾藩鎮守宰大小士民咸奮忠義敵王所愾或催趨兵馬或督運糧餉同心同仇以赴國難於乎王事孔棘爾莫愛身須時有

功予不吝賞故茲教示想宜知悉

諭中外大小臣僚耆老軍民間良等

王若曰嗚乎治亂興衰有國之旣必不免然究其旣以致未嘗不由於一人之得失方其事變之未作也恬嬉偷安敗度失德上怒下叛昏不省念馴致禍敗啜泣無及循覽前牒每用傷惕不圖今日乃蹈斯愆予以涼德遭罹否運宗國將覆不容坐視祇畏明命臨蒞崇高夙夜憂懼慮旣以保國安民顧予明不足以燭理仁不足以澤物信不足以感人武不

足以制亂發政圖事動乖道理賦煩役重民
困兵疲甲子之變逆豎反噬廟貌顛倒神器
玷危濇患召亂咎實在予迺予不能懲創違
謬愼必舉措德日益泯政日益汚天災物怪
式月斯生衆謗羣譴靡所不足將卒失機而
予不知隣敵伺釁而予不覺以致逆虜大舉
猝犯西陲龍灣雄鎮一朝陷敗武庫軍實盡
爲賊有凶燹內侵已過定州豕突之勢莫可
遏制浚惟宗社大計兼採廟堂羣議茲奉廟
社慈殿及中宮八避江都倘賊勢漸逼則予

亦將遷幸事至於此更何言哉嗚乎播遷之
辱雖使百年一值猶爲大變予於四載之間
已再遭焉旻天仁覆夫豈酷予靜言思之莫
非自取蓋予當鼎革之會繼大亂之後不能
布德行惠大庇庶民失措非一二卽祚之始
有意民隱蠲除之令蓋屢希而奉行不稱實
惠未究嗷嗷塗炭者其不謂予罔民乎此予
所以失民之一也逆節屢起大獄相仍元惡
渠魁固宐伏辜株連屢及豈無橫枉一夫含
冤足傷天和况不特一夫乎此予所以失民

之二也西鄙宿師屯鎮督納糧餉行齎而居
送頭會而箕歛民窮財盡內外繹騷雖事非
得已而民何堪命此予所以失民之三也至
號牌之法本欲補逃故之餒除隣族之弊初
非所以病民也然猝舉百年廢典強束許多
遊民急於就緒未免無漸拊勒過嚴程督太
密人或言其不便予獨難於中輟積犯衆怒
誰諒本心儒生攷講實非創始事倣舊典亦
乖時宐志雖存於勸課人反疑其苛刻此予
所以失民之四也書不云乎一人三失怨豈

在明况予有此四失危公之至非不幸也亂
如此膺凶奴荐食五廟蒙塵慈聖芟舍無兵
可以戰守無食可以給支智者不能爲謀勇
者不能出力瞻四方而靡聘涉大水而無涯
言念時事維其棘矣雖然天地有至仁之德
未嘗絕物君臣有素定之義豈忍棄予今予
將回心易圖舍舊從新召還諸道御史采心罷
號牌焚其成籍凡前後坐號牌事自繫徒配
者悉皆宥除以與斯民更始維新括良丁定
克軍役者仍存不改各道籍軍成案不在燒

火之中咨爾中外士民雖以予爲不君獨不感列聖覆幬之遺澤乎卽予喪國雖不足恤獨不念宗祊之殄祀八路之魚爛乎茲以一紙悃悞敷誥多方其各諒予此心激昂忠義奮勵股肱或召集義旅來赴行在或鳩聚糧儲轉運軍前各隨事力之所及以盡分義之當然言非騰口實出情悃故茲敘示想宜知悉

宣諭三道士民

王世子若曰國運迤邐虜勢猖獗連陷大鎮猝

犯內地顧我主上深惟宗社大計且念慈
殿震驚遷幸江都以爲據險遏賊之圖且命
予小子受分朝之寄視師于南貌茲幼冲當
此巨艱聖上非無顧復之念予小子豈念
晨夕之奉哉所以割慈忍愛冒險就遠以至
于此者庶幾維繫民心鼓動義旅拯君父於
艱危回國勢於顛擠此誠區區之至願而未
知所以爲計也惟爾三南士民自乃祖乃父
涵泳二百年文明之化忠信之美比屋可封
變亂之際常賴其力雖國家負爾士民爾士

民未嘗負國家遠而壬辰之難近而适賊之
變爾士民乃祖乃父及爾之身或率旅勤王
或聚糧濟餉厥有義烈昭載紀籍酬報之典
有不暇言也况今胡羯之變古今所罕腥羶
汚於壇域禽獸逼於人類此正忠臣義士忘
身殉國之秋立事圖功之會也誠願士民等
咸勵厥志各殫乃力父詔子兄告弟或倡起
義旅或募聚義粟或捍衛江都或遮截漢津
或出奇剿賊或遣謀撥賊大小齊奮遠近相
應庶可以直爲壯因衆成功中興之績微爾

士民將誰望哉曩因廢朝橫政瘡痍未蘓
聖上臨御國家多故雖心切如傷實惠未敷
爾士民亦必諒之至於號牌之法本欲均賦
繕兵以防寇賊之釁有法無人操切太甚以
致邑里怨咨咸懷不便 主上濇懲其故除
實軍案外已將原牌案燒除不用中外罪囚
惡逆大故外皆加蕩滌爾士民亦宜各陳弊
瘼各效計策則凡係民生利病庶政得失可
行可罷者予當優宥從事其有竒才濇識可
備帷幄武勇才力可合領衆者或限於科目

或拘於常調沉淪草萊不獲展布者必多有
之宜各奮風雲之志毋失經綸之期或杖劔
來赴或勸駕起送予當聞于天朝承命除
拜雖至一才一能微勞細功亦將甄錄收叙
母或失信嗚乎非忠無君非孝無親中國所
以異於醜類生民所以異於鱗介靡不在此
予小子雖未敢多告爾士民其尚念我祖
宗念我君上母遐棄予以佑邦家故茲諭示
想宜知悉

義所招諭文

伏讀 聖教細細十札辭旨懇惻此正忠臣義
士灑泣登途之時也嗚乎國事之艱危旣棘
玉音之宣諭屢下而爲臣子者苟懷遲回觀望
之意則是無君也烏得免後君之誅耶將及期
整旅以赴 君長之急其各厲氣張膽無使腥
羶汚我壇域也違者斷依軍律

號召使闕

附

爲盡心舉行事國家不幸西變此極臣民之
痛何可勝言不意今者遽承號召之命責以
董率之任此非老病所能堪當而國事至此

寧不痛心茲於列邑各定義將糾合義旅至
於糧餉一款辦出無路各邑兵糧則已有自
官辦措而若或賊勢鴟張軍兵久持則此後
繼用不可不預爲措置茲送募糧官令飭軍
務各邑守令同議開諭鄉校書院鄉所及一
鄉大小人員并心合力各出斗斛以助萬一
而其中私貲優於用餘者則亦爲十分曉諭
示以能散周急之義使之盡誠則隨其多寡
將爲啓聞處置并以此意着實施行事

管餉使關

丁卯二月初六日到付

管餉官前行弘文館典翰李垓爲應募糧餉
以補軍需事嗚乎國家之變古昔所稀邊城
蕩然大駕播遷在我臣民之分曷勝心膽
之裂矧茲嶺南素稱多士冀北風俗之美禮
爲教而義爲習艱危之際子死孝而臣死忠
惟我號召使張叅判鄭副學兩相公承朝
廷命令倡一道義旅風威雷動忠義天知顧
念列郡應募厥數雖多而軍興之食自潰有
虞患惟糧餉之繼實在私儲之募務欲銖錙
之盡急救庚癸之呼茲以諸君差爲募粟有

虎溪先生遺集卷之三
一
司切望開諭同志應募闔境克奮沫血之志
共濟熯眉之急賊禍有滔天之慘闐闐無結
艸之防今日之憂此事爲急嗚乎國運無往
而不復恢復之道須藉於盡忠人心有感則
必通遠近相應則傳檄此賊未滅雖有粟而
食諸諭文旣過必投袂而起矣願傾資而應
募須重義而輕財

虎溪先生遺集卷之三

虎溪先生遺集卷之四

倡義錄

諭一鄉大小人員文

兩子

嗚乎自古讀書講義之士皆認以君父爲一體
忠孝無二致孝於家者必忠於君而每當國家
有變之日則仰如父母之在水火中汲汲焉若
赴難圖存之不暇而捐身殉國者亦有之嗚乎
今日之變古昔之所稀邊城推陷大駕播遷
其在神人之共憤豈敢少俟邯鄲之朝暮而復
若秦瘠之越視也此不佞所以告諭於諸君子

已至矣矧乎丁卯之伺釁未久而特遭危險惟我臣民尚有忠憤之餘激者乎嗚乎我嶺南素稱多士府庫禮義之風俗相傳忠孝之聞見慣習每於艱危之際惟知子死孝臣死忠切望諸君各奮沫血之志共濟燃眉之急如何方今賊禍有滔天之慘國勢有累卵之危諭文旣過之地若不投袂趁起則諸君之平日旣講義理果安在哉嗚乎湯掃之期須藉於盡忠人心有感天意必通此賊未滅之前斷當矢死勇赴不愆于伐此意一一知委以爲著實舉行事

後錄

一擇勤幹有計慮者爲各面有司開陳利害至誠告諭聽其所納勿爲勒推

一富實有儲峙之人不可汎隨貧戶出資但止塞責而已須念捐困之義以濟軍需

一旣募皮穀派給老弱之不堪從事者預爲作米以待搬運

一此文未到前必自各面已有募糧之舉而却恐閭巷不知國事之急汎當應募故更爲知會前後旣募成冊火速上送則一一啓聞以

爲他日賞功之地

一今日之事與曩時不同沒不至救急於有亂之日而闕賞於無事之時并以此意開諭

通諭道內文

義兵將爲通諭列邑父老儒品民庶事嗚乎十年伺釁之賊豕突於今日龍灣安市高壘屹矣府尹巡邊烈士殞矣關外諸藩已成望風之勢箕封以西方作豺虎之場旄倪何罪血濺凶刃子女爲俘盡入陰山寇勢日浚而人心日搖遷國圖存誠出於廟筭之不得已也嗚乎蒼黃海

門三宮播遷二百年 廟社托在孤島之中京
城波蕩士女魚駭誰無父母扶携道路誰無夫
婦逃竄山谷不但傳變之身世無處求生言念
周室之艱危稅駕何地今日國事蓋不待志士
而痛哭矣嗚乎惟我東方地雖褊小而衣冠文
物之盛禮樂教化之懿稱爲小中華於天下者
千五百年于茲矣豈有一烏狂寇盱乘而僂作
腥羶韋毳之域哉氣數盱關雖不能免而天之
助順理必伸矣况嶺南人材之府庫國家之根
柢 列聖之盱培養先賢之盱教訓戶有節義

之風家傳忠孝之俗義聲既著於壬辰忠憤豈
慊於今日 朝廷之旤期待本道者不淺鮮矣
嗚乎適道素以草野踪跡爲 聖代之棄物既
不能格君匡時以救危亾之禍又不能投筆請
纓以效敵愾之忱獲罪於鄒魯諸君子固已多
矣自知不足以激人心首倡義旅而受重責於
危難之際義不敢辭飲血而誓日夕焦煎惟不
克効力是懼旤恃者秉彝向得之天自我發之
而諸公旤學之得力正在此日耳嗚乎諸君子
平日讀聖賢書旤學何事當國勢綴旒之日若

不能慷慨奮發忘身德國但向草間求活則其
於名義何居如使鐵騎充斥八路靡爛則諸君
之身之家若妻若子果能獨保於乾淨地乎義
理如此利害如此忘身殉國猶愈於束手就屠
況義不量力終未必死者乎嗚乎越若士大夫
暨父老民庶至尊泥露其忍聞乎廟社蒙塵其
忍視乎屢朝恩澤其忍忘乎冠裳左袵其忍忍
乎况今 教書又下玉音琅然屬望於本道多
士者不啻丁寧譬如父母在水火之中而望救
於子耳於此而不灑泣投袂而起者則亦無復

人理爲矣元冲甲一書生耳能以鄉兵大挫紅
巾之賊師直爲壯寧有古今之殊耶凡有血氣
者各奮見義之勇且效同聲之應招集鄉里糾
合徒衆協同官軍以竢規劃或遮絕嶺路捍衛
分朝倘有委靡退縮不肯應募者務加曉諭至
再至三猶不聽信則是甘心被髮而自入於後
君之罪也大義所在自有常刑然本道寧有如
此之人乎嗚乎凡我同志之人咸聽用曹之誥
懲行枉而揮涕有死之心額爾衆而同仇所
重者義宜審熊魚之取舍以破犬羊之心膽言

所不盡開列于後各宜照詳

節目

一今日丁壯盡入於官軍無一名遺漏召募之
難倍於丁卯然官家調發不無餘遺就其中
募得驍健可用者切勿以成冊按名推求只
令各里士子一一詢訪詳加開諭使之應募
一務精不務多本是兵家勝筭况今糧運極難
尤不可多聚無用之軍以致有損無益必須
募得有膽氣有膂力精悍勇猛者以爲著實
効力之用

一義兵須與官兵協勢然後可以有濟而官義兵常患於不協此壬辰以來已然之事也今日本道事勢又與壬辰不同不可有一毫侵占之事如有謀避官軍者勿許應募

一今日募糧之難甚於募兵而軍兵既聚之後不可使之自食又不可聚用官穀多定募糧有司廣行開諭使之隨力應募庶幾積小成多以爲接濟之計

一積粟富家當此急難之日寧有惜財之心設或不幸而虜兵濫入則雖有粟其不爲大盜

積耶須以此意至誠開諭使之傾困倒廩以效殉國之義其間或有有志之士本無惜財之心而但以納粟之名爲恥不肯應募者則此乃避嫌之小節非殉國之忠心但能重義輕財效力於急難之際則他日國家酬報之典乃是倘來之事非所當避此意亦可勉諭一應募之兵皆是白徒必無堅毅仗極爲可慮今方移文兵水營及各鎮浦收合弓矢鳥銃火藥等物矣然吾輩所仗者只是忠義而果能堅此心則雖持三稜杖可以奮勇也

一各邑召募官各擇同志之士稱爲召募有司
使之遍走閭閻開諭小民或兵或糧隨所募
得一一開錄成冊以待從事官之行或先爲
報知則尤好

一今去通文旣狂召募官到卽謄書各其邑下
填書時刻後卽令校奴或院奴次次飛傳毋
得一刻淹滯終到處則元通文還送于旣屬
從事官以憑後考

一本道幅員甚廣同志士子及應募軍人等難
於一處聚會故左右道分爲六都會令三從

事官各管兩都會使之巡行檢飭以省往來
聚會紛擾之弊各宜知悉

一當職行未踰嶺聞本道諸君子倡義之檄已
交馳於道路同心之喜曷有極哉當以此意
馳報轉聞矣凡事更須十分著實以副朝
廷屬望之意

一今見遠近官各分日期齊會咸昌此是當初
急於勤王而不暇念及事勢耳今當面論
停寢此事諸君姑勿爲赴會之計須先急急
召募擇可堪將領者使之率領操鍊明其部

伍以待改傳令朝令夕發

一各邑必有私砲手不屬官軍者各須詢問有應募者各給羽林衛帖不願者則當給賞布以此意開諭

一庶孽許通帖三百張啓請賣來三從事官各持一百張每一張定價白米十石以此開諭應募者一一置簿報從事官出給次

一召募之事雖以忠義爲主軍中亦不可全無法令如或有違拒不從者杖二十以下義將自斲重者報于都義所施行

倡義日錄

丙子十二月二十日以倡義之意發文諭于一鄉大小人○營關內本月十四日原任大臣尹昉金尚容陪宗廟社稷赴江都妃嬪王子皆隨行東君親執鞭策大駕前後隨行射隊失度城中士女四散哭聲震動云

二十一日營吏文告內本月十五日崔鳴吉啓云胡言今我之行專爲和事而爾邦人民潰散至於主上播遷心甚不安若堅定和好遣一王子一大臣及斥和人數三則當還去云

○又云賊兵進陣于楮子山

二十二日一鄉齊會推余爲義將余以病廢固
辭不獲乃爲倡率義旅之計○有人來言王
弟綾峯君諭和好之意云而未知虛實○夕
後營關來到內洪瑞鳳韓汝稷往胡陣誘曰
王世子時在江都還則以送虜曰世子然後
可也世子聞之陳于上前曰若事迫則臣當
往 上以大君代之胡不應大君還報朝臣
相顧無語新豐君張維曰世子即可往矣諸
臣相應曰計已定矣禮判金尚憲正色大責

曰公等何以爲此言也吾與公等不復共立
體府還入待罪 上曰此非相持之日卿等
各還安職世子曰吾何有不可往之理云云
二十三日鄉員齊心奮勵峻議義旅約束嚴整
紀律甚密然其募軍一款全境之丁壯者盡
入官軍所餘者止是老弱甚悶

二十四日諭募粟有司自丁卯兵革之餘歲不
登而公私儲蓄竭盡今日募糧有甚於丁卯
雖一斗一斛之穀出義無隱以助軍需則當
一一稟報事○是日安東義陣關文來到

二十五日本道兵使許完督列邑發兵關文來
到辭意截嚴云昨見京關則君父方在水
火中而諸道勤王兵訖無形影當此危迫
凡爲臣子者豈忍如是且上御樓上頒哀
痛教有曰一隅孤城和事已絕內無可恃之
勢外乏螳子之援百官聽教莫不號痛云本
道各邑火速發兵以今晦日會于咸昌以勤
王事云云

二十六日本邑軍容稍成而雪路冰程兵馬失
足勢難發程然咸昌期日急迫領軍發行執

弓者百五十餘執砲者二百三十餘凡陣中
指揮諸員五十餘合四百餘名是日宿桃院
○西來消息互相傳播不可的知然賊至南
門外請曰有通議事送信人可也云故遣戶
判金蓋國則賊曰十年和約何可一朝倍之
爾國奸邪旣已稔知矣雖欲夏和難矣云
二十七日早朝餉軍到比安聞各邑義兵皆未
發程當此 君父危急之日尤不勝紆鬱比
安倅持督兵關文出接而關文內軍兵擇其
勇健者軍糧使之精繫繼續箭矢火藥等物

亦優備無至臨急窘踰云

二十八日西報日益因措故不得留待列邑義兵領軍發行而砲軍二名發病不得進使之少差後急急來到無至抵律○是日到安溪聞列邑義兵多發程云吾領士君子爲國同聲之應甚喜甚喜且聞胡賊乘勢國兵皆有退縮之意云自不覺憤裂遂令軍中曰仁不以勇義不以力各自奮勵則可以一夫當百吾何畏彼哉是日聞都元帥金自點領軍陣于薇園逗遛不進而原州營將權正吉屯于

黔丹山下云

二十九日大雪凜風軍卒手足俱凍亦寒氣剝膚又以風眩發作強扶登程○本道兵使來陣尙州云○城中急迫之狀日間益甚忠憤所激不覺淚下寒程軍行飢寒若無尤難馳行是日發關本邑募糧所到三灘留宿

丁丑正月初一日日氣稍和早起餉軍發行聞湖嶺各邑義兵次第發程爲國之誠誠無異同矣○本邑僱家僮來云二十九日體府使率軍百餘人自北門緣山而下賊亦出百餘

騎相拒我國又出砲手二百餘人體府麾旗
令進軍兵惶恟不進斬其不進者我軍遂下
山聚于松城外賊策馬突入我陳我軍不得
放一砲一矢大亂潰散為賊踏死者不知幾
許云聞來膽裂心寒○是日到咸昌

初二日余氣不平食飲寡減不能領軍發程然
強扶行軍暮到咸昌留宿

初三日小雪氣漸不平強起發行至烏嶺東院
軍兵凍寒面無人色矣○聞大殿寢具皆為
賊所掠義昌君進羊皮衾 上自此不得就

寢至於供具不能繼魚肉陪臣剖冰捉柳目
魚煮進上嘉其味問曰是何魚也侍者對
曰柳目魚上曰此魚味甚嘉賜名金增魚
云伏想御供之甚薄○又聞忠清兵使及都
元帥與賊戰于黔丹山下皆敗走而諸道義
兵聞賊勢熾張逗遛不進或前進多障距漢
山二十里之地卽雙嶺也胡兵橫截道路不
得通於朝廷日夜積柴放火焰漲天使
城中知援兵在邇一夜自城中送開元寺二
衲戒以勿輕進兵云

初四日雪稍晴領軍到水乞○聞列邑義兵多
敗于雙嶺云不勝憤裂且本邑官軍都總金
燁於丁卯之亂與余倡義者今以領軍前進
尤深係慮本陣糧餉每患不給是日發闕本
縣募糧所及寄書伯兒使之督運軍餉而戒
其曉諭以理切勿勒推之意○聞上詔崔鳴
吉製賊書答有曰朝鮮國王某謹百拜上書
于大清國寬溫仁聖皇帝小邦獲戾大國自
速兵禍棲身孤城危迫朝暮已知罪矣有罪
而恕之盱以體天心容萬物者如蒙念丁

卯誓天之約恤小邦生民之命令小邦改圖
自新則小邦洗心從事自今日矣伏願皇帝
垂察焉遣書之時 朝廷互為持難鳴吉曰
吾等雖為萬古罪人今日之和不可不為也
以李景穆遣胡胡曰使王子八來相議云

初五日早朝餉軍發行到大秋院聞各道官軍
與義兵多敗于黔丹山云○又聞杞昌君俞
曾上疏極陳海昌君尹昉及金塗誤國之罪
朝廷肅然

初六日大風雪不得行軍因留于秋院星州以

卒來言賊捕朝鮮人男壯者削髮為軍老者使之樵薪婦女之年少者置軍中老醜者備其炊汲且我國軍士凍餒死者甚多云○午本邑都總金燁馬卒逃下聞義城義兵留此地來言今初三日金燁三昆李戰死雙嶺云初七日稍和領軍發程到困酒店○聞朝廷欲敦和事使左相洪瑞鳳往賊陣賊責以負約且曰觀爾國文簿則皆稱奴賊爾國之罪實所難赦我之行事光明正大何敢以我為賊因以書授之有曰大清國寬溫仁聖皇帝詔

諭朝鮮國王僅以一身逃入山城縱延千年
有何益哉云云

初八日早起餉軍發行日暮到柘醴軍卒多有
凍餒者○聞湖嶺義兵多敗雙嶺京畿義兵
戰于廣州皆敗走而死者殆多胡兵死者不
過數人而胡將將兵入城云

初九日早餉軍卒是日馳到龍仁夜已初鼓遇
大邱軍卒逃下者問之則兵使主不知賊屯
雙嶺無疑踰嶺爲賊所敗全羅兵使領兵入
據光皎山然未知虛實賊兵之猖獗不可枚

舉云

初十日馳到廣州漢山○聞江都胡兵跳跟侵掠罔有餘地極爲憤歎

十一日日氣寒冽因留漢山聞城中爻象慘不忍言○大駕播遷南漢幾至一朔寢食諸具冷薄極甚忠憤所激感涕先下○時李弟悅道扈駕在南漢園中尚未知死生尤極悶鬱是夜賊放火烟霧漲天

十二日朝廷日敦和事禁止各道軍兵義旅皆使退去聞不勝憤鬱方八城抗疏又聞胡催

和議 朝廷使崔鳴吉洪瑞鳳許佃尹暉等
持國書遣胡其書曰朝鮮國王某謹百拜上
書于大清國寬溫仁聖皇帝小邦君臣延頸
企足日竢德音而今已浹旬訖無皂白執寔
情迫未免再號惟皇帝察焉又曰君臣父子
兄弟久處孤城其窘亦甚誠於此時特蒙大
國翻然舍過許其自新俾得保 宗社長奉
大國則小邦君臣當銘鏤感戴至于子子孫
孫末世不忘願溢矜小邦恢張河海之澤今
皇帝新建大號首揭寬溫仁聖四字蓋將以

體天地之道恢霸王之業則如小邦之願改
前愆自托洪庇空不在棄絕中云云胡答曰
今日已曠矣惟難徃復以明日自西門來則
與之相議云

十三日僅入城中城中柴糧俱乏日勢極寒我
國人民凍餓死者無數○訪金尚憲鄭蘊諸
公相議方爭講和之非問李弟晉甫旰在曰
吾亦不見已數日矣○是日朝廷使崔鳴言
諸人持國書徃見龍馬兩將彼曰向者背盟
之過在我乎在彼乎鳴言叩頭謝曰此非聖

上之誤悉吾等之罪也願休咎焉又曰爾國
何不一戰答曰小邦何敢與大國抗戰乎賊
遂持國書入陣有頃出口獻于皇帝則曰當
商量回報云云○午康秦陵放火我國君臣
莫不失色墮淚○賊自南門外放砲聚斃無
常莫知其狡猾之計○都元帥金自點終不
進兵 朝廷心甚恠之

十四日極寒大風我國壯士晝夜露處凍寒之
狀慘不忍見矣○是日烟焰蔽天問之則曰
胡放火獻陵云本國人士莫不憤惋

十五日賊勢熾張各道各邑狀啓不得入已有
日官軍二人始入來獻啓文卽沈器遠狀啓
云臣與北伯南兵使共陣于陽根金元帥到
兜山遇賊大戰三別將將八百餘騎到安峽
慶尚左右道官軍與義兵到雙嶺敗歿忠清
監司亦敗走不知去處全羅兵到半屹山監
司則到安城云○是日與金尚憲鄭蘊同議
國事不覺血淚沾衿共陳罷和議疏 上曰
汝言甚嘉然到此地頭莫可奈何

十六日風雪極甚午後賊以木牌書招降二字

立于南別臺下其跳踉之勢莫能禦之

十七日稍晴賊書來到而書末曰天道福善禍
淫至公無私朕體天地之道傾心歸命者優
待之望風請降者全安之逆命者奉天討之
黨惡撓鋒者誅之頑民不順者俘之今爾與
朕爲賊國故我今興兵至此若爾國盡入版
圖朕豈不有生養全安之若赤子哉今爾欲
生也宜速出城歸命欲戰也亦宜一戰相接
上天自有處分云送崔鳴吉往賊陣告曰如
此難從之請不可猝然決定姑爲緩稽賊曰

從速畫策云云

十八日稍和賊至南門招曰欲和好則可也若不然則當決戰深量處之 朝廷使崔鳴吉製國書其辭曰伏承明旨勤賜申諭其所以責之切者乃所以教之至秋霜烈日之中帶得春生之意伏讀惶感措躬無地今之所願只在改心易慮洗滌舊習舉國承命備此藩臣而已至於出城實出仁覆之意顧念重圍未解帝怒方盛在此亦死出城亦死是以瞻望龍旗自分必死情亦慼矣古人有城上拜

天子者禮不可廢而兵威亦可怕也皇帝方以生物爲心則小邦豈不在全活優養之中乎伏惟帝德如天必垂矜恕敢吐情實恭頌恩旨金尚憲見其書卽裂涕泣曰公等胡爲如此事也鳴吉曰吾等固知受台鑒之責蓋出於不得已卽拾其裂紙補綴金判出言曰國事之使之日非者某也與之相泣

十九日甚憚使崔鳴吉尹暉等傳國書胡受書見曰爾國王何不出城二人力言不可出城之意胡不答書曰當從後修答諸人皆空還

○余見金尚憲自裂書後食飲專却臥念國事涕泣沾衿

二十日大風雪深尺餘送李相崔尹等受答書還辭旨凶悖其書曰大清國寬溫仁聖皇帝詔諭朝鮮國王爾違天背盟故朕赫肆怒統兵來征志在不赦今爾困守孤城見朕手詔切責方知悔罪屢屢上書求免朕開宏度許以自新者非力不能取也十分含忍又曰首謀背盟之臣朕初意盡戮之今爾果能出城歸命可先縛送二三人朕當梟示以警後之

誤朕西征之計陷爾生靈於水火者非此人而誰也 上見之曰寧與斥和人俱死不可縛送因淚下諸臣皆痛哭聲聞于外

二十一日崔判李相等持國書往胡陣而辭意以出城縛送斥和人爲難胡曰如此則和事洩不可成李相曰以兄弟之國稱則事當容量夏何詔難從之事乎胡曰爾歸告爾王李相卽還

二十二日氣和早朝傳曰軍兵免賤者亦給復戶各以其技將取萬科之意使諭于城堞且

世子下教曰吾有子又有羣弟吾豈愛自身
不爲保 宗社之計乎明日吾將出城 朝
廷皆曰寧送斥和人世子不可往叅判鄭蘊
曰臣雖非請斬胡使至於斥和臣皆主之縛
臣送胡云云李命雄亦陳斥和之罪世子曰
姑退安心是日胡大供餉軍故受無催言
二十三日朝雪而午晴撤開元寺一廊以爲城
堞炊爨之具○胡陣壯士百餘人仗劔訖
闕下曰何不從速出給斥和人堅定和議也
朝廷使鳴吉製國書奉遣胡陣曰臣旣委

躬陛下則陛下之命固當奔走奉承之不暇
而至於不敢出城之由則臣之情勢實有如
前日所陳只此一款臣有死而已至於斥和
諸臣實小邦君臣之所共憤也首倡臺諫洪
翼漢上年斥拜平壤庶尹斑師可得縛送其
他被斥在外者道路不通難尋其去處請於
師還之日查得以待處分胡見書曰如不縛
送斥和人則和事不成金判聞之以斥和待
命於闕下臺諫尹煌亦待命於闕下校
理尹集修撰吳達濟亦以斥和首罪上疏待

命上曰予無斥和臣縛送之意卿等安心
退去

二十四日雪晴賊一邊有敦和之意一邊有掩
襲之計以此以彼廟筭無策夜砲聲忽起於
西暗門外人聲與砲聲相雜撓亂有頃聞之
虜賊欲乘夜踰城襲之城內守卒覺之相與
接戰云與金尚憲徹夜不寐共憂國事

二十五日稍和虜賊十四人來西暗門外呼曰
我皇帝以朝鮮國王不為受命怒欲擊之應
之可也且急於還國爾國事專委於龍馬兩

將明日將欲發行若皇帝還國爾國雖欲結
和事不可成云 朝廷聞之相議明日早朝
世子率斥和人送胡陣可也聞不勝憤惋
二十六日洪相崔判往胡陣通世子與斥和人
出城來見意胡答曰爾國王不共來耶以江
都內官羅僕及珍原君大君手書及尹昉懷
恩狀啓文牒一一出示曰吾盡取江都且淑
儀嬪宮及大君夫人以本國人陪行明日當
來到而府庫則使之堅守待爾國王出城然
後當輸八于闐爾國王不出有何疑慮而然

也時城中未知江都事自聞此言偵按虛實則事皆然矣 朝廷莫不驚惶失色

二十七日大霧是日會君臣乃沒出城之議使崔判持書遣胡曰早欲朝謁畏兵威未果幸蒙赦宥明欲出城儻蒙聖明之德得免異域之鬼何幸何幸答曰第待夏諭出來是日金尚憲引繩自沒傍人適知而解幸得不死鄭蘊吟四言詩曰主辱已極臣死何遲舍魚取熊此正其時陪輦投幣余實恥之一劍得仁視死如歸引佩刀自刎其腹幸賴傍人之救

雖不致死血遍全身矣

二十八日朝後賊來西門外呼之崔判與洪相
往則龍馬兩人曰爾國於南朝往來時其禮
何如答曰奉敕者南面立侍臣受之又曰以
爾長子爲質諸臣有子者以子無子者以弟
爲質又曰明日不可不早行禮而禮則古有
其規爾國何以爲之洪相曰國王常著袞龍
袍以此服來見耶答曰不然以藍色服可也
洪相曰出自南門何如曰不可有罪者不可
出正門自西門可也又曰此後更勿通南朝

月海集卷之二
歲貢則白金一千兩白苧布一千疋白米萬石黃金一百兩虎皮三百張爲約崔判洪相卽還

二十九日吳達濟等集以斥和罪將往清陣故拜謝 闕下上曰卿等父母妻子予當顧恤是日崔鳴吉等率二人往清陣則清主曰爾等何爲斥和對曰我國臣事大明故只知有大明不知有清國清主笑而因留之謂崔鳴吉曰爾國王明將早來陪從者無過數百人云云○鄭蘊上疏曰臣之欲自浚者正爲不

忍見 殿下今日之事也一縷殘命三日猶
存臣實愧之鳴吉既使 殿下稱臣出降則
君臣之分固已定矣臣之於君不徒承順爲
恭可爭則爭之彼若求納 皇朝之印殿下
將爭之曰祖宗之受用此印今將二百年之
久矣此印當還納于皇朝彼若助攻 天朝
殿下當爭之曰明朝父子之恩清國亦知之
教子攻父有關倫紀非但攻之者有罪教之
者亦不可云則彼雖凶狡亦必量矣伏願
殿下以此二者爭之無得罪於天下後世千

萬幸甚因伏地痛哭 上嗚咽曰予與卿等
安得復爲太平君臣以盡都兪之樂乎左右
莫不垂淚於悒

三十日霧而陰 上與世子將幸清陣著前日
盱送藍色服出西門陪輦者不過四五百人
上至松城清主設壇九層其上鋪龍文席雲
錦繡蛟龍褥坐於其上令我君伏地謝罪羣
臣請鋪席清主曰有罪不可鋪席朕當使之
面縛輿櫬浚患減科爾宐知悉 上進前三
拜伏地叩頭清主令上升階西向坐行酒後

出淑儀嬪宮大君夫人見上前令上還宮世子及大君與之北行故因留之上將渡江入城人心稍戢然城外城內氣象愁慘

二月初一日稍和與斥和諸公相對痛哭卽發還鄉

初二日晴兵革之餘歷路旅店大半燒火或兀立空舍雖有贐寢食一款極甚非僂况無贐頗悶

初三日遇本邑倅家倅多有奸賴亂離之後人心太變間有剽掠之患不得任意行役

初四日終日微雪到忠州境道路酒店與遠近村落雞狗之聲人民之居略存前樣

初五日晴行未幾飢渴特甚不得進一人見余頗色賀進數盃酒飲之少免飢渴是日踰烏嶺到聞慶訪主倅留宿頗厚

初六日朝後發行聞慶倅以五拾銅饋贐是日到幽谷

初七日大雪午後稍晴是日到三灘留宿離城殆五六日而京城消息寂然甚鬱

初八日晴發行吟一絕曰聖恩虛負海量濼俯

仰乾坤愧我心望裏家鄉嘉遯處 皇明日
月照園林是日到比安

初九日午後到家家累無故保性命云

後識

丙子十二月丙辰金虜突入我都城國勢危
在朝暮凡有一分拱北之心者孰不憤泣而
激發哉府君曾於丁卯之難未得伸忠憤之
志及夫丙子再犯之日遂與鄉人謀劃義舉
不肖等以老不堪之意泣諫則府君責之曰
當君父危難之際凡爲臣子者豈可忘分岸

視徒爲保軀之計哉今雖血氣旣衰尚有義
理之勇汝等勿慮乃勒兵登程及到廣漢則
和議已定遂詣闕封章極論其非慨然南
下構軒於薇谷下日以書史自娛享年九十
而終嗚乎府君承述乎祖武忠孝之學孺染
乎師友靜修之工早知吾道之端的再赴國
難之艱險此可以見樹立之卓爾然恨不得
大施廊廟只以郵官陵署未展其所蘊則在
府君雖淡如也而豈不爲子孫無窮之憾耶
至若實行大業已悉於阿兄家狀今不必更

爲架壘而惟所感於中者自不能已故略記
平日見聞所及者於卷尾以爲子孫之所典
型焉不肖男玷泣血謹書

後敘

炳日於千秋之上而皇綱振聞風於百世之
下而志士勵此固古人之所難辦常品之所
未能也昔在 仁祖丙子之亂乘輿播遷國
勢岌業其時擁兵之將率多逗遛而惟金君
湜鄭君弘溟倡義於嶺湖余甚壯之在廷之
臣多主講和而獨洪公翼漢吳公達濟尹公

集苦心斥和余甚尊慕焉然而倡義者未必
皆斥和之人斥和者未嘗有倡義之舉誠以
一節猶難而兩兼未易也矧茲一人而再倡
義兵亦世所罕有者耶惟我虎溪先生曾於
丁卯西鄙之陷虜也糾合義旅輸糧詣闕
又於丙子南城之逼賊也召募義旅星夜馳
赴先生之倡義凡再矣聞和議已定封章而
非之和詩而斥之遂退薇谷杜門謝事先生
之於斥和亦至矣偉哉先生之大節也先生
諱適道字士立嘗請益於寒旅兩賢之門得

聞淵源與二弟廬墓盡禮以孝友聞且任水
溪山丈割鄭賊之籍扶植大綱而若是乎倡
義則似兩義將斥和則似三學士其大義高
節固可以炳千秋而勵百世也夫歲丁卯孟
冬下澣後學小宗伯晉山姜蘭馨謹敘

跋

虎溪先生申公倡義之錄凡二篇此爲公之
一惠而欲觀其大全者亦於此而求之可也
夫俎豆軍旅事雖殊而道則一孔子曰未學
軍旅有爲而言也世之以儒名者往往以軍

旅戰陣不干已事平居則筆下千言而曾無
一策臨事則失主章皇而不省其死所此豈
吾儒之正法哉公生退齋之家已聞罔僕之
義悔堂爲祖而陶山之淵源有自城隱爲父
而又知王事之當急家學正矣心法要矣方
其講道於山林之中也知公者知其爲儒門
之碩德而不知其爲干城禦侮之材乃若我
憲文初服以藐然一庠生膺師命而敵王愾
竟以和事之成不能發一矢而殪一賊粵十
年胡兵再徇南城被圍公倡率義旅雪涕登

壇指顧如風霆義聲動天地長軀於兩湖之
北而若將指日掃清奉六龍而旋軫不幸國
家有澶淵之恥而無復可爲上疏斥和明天
下之大義遂復卷而懷之隱於鶴山之陽薇
歌悽愴自寓蹈海之志是蓋以文武全材奮
忠義之志自任以綱常之重而不規規於聲
名之末也竊嘗論之是不獨家庭之所本亦
有所受於師門者也吾先子倡道於東洛之
上而公登門請業屢被獎許及夫天綱墜地
冠屨易常吾先子遯于永陽而公守鶴山之

節若公者可謂盡事一之道而以其所受足以發於其私也當是時也廟社之血食不改羣公之從仕依舊而公微官也乃獨高尚其事老死於窮荒之滋而其志則鼓鼓之刃學士之鼎也其迹則泯然數百年不并列於尊周之諸大夫是又足以念世道而長吁也後孫敦植懼其久而愈昧輯其倡義之蹟及諸家文字將劖劖以壽世而謂余以先師之裔索一言以誌嗚乎今日之域中何如也身爲俘虜吾不能從吾祖于永陽而讀公遺事安

得不悽然以悲也是書于篇末以寫其感慨
高景之忠 崇禎紀元五丙辰 露節仁州
張錫英謹跋

虎溪先生遺集卷之四

四

虎溪先生遺集卷之四

뒤표지 앞면

